

**Erngup nukingata innaallagissionermut atorneqartarnera pillugu Inatsisartut inatsisissaattut siunnersuut**

(Ineqarnermut, Attaveqarnermut Angallanermullu Naalakkersuisoq)

**Saqqummiussissut  
Siullermeerneqarnera**

Aningaasaqarnikkut imminut napatissinnaanerup anguniarneqarnerani, pinngortitami pissuussutitsinnik atuiniarnissaq pingaarutilittut inissisimavoq. Pinngortitami pisuussutigut inerisaanissamut inuussutissarsiutillu ineriartortinneqarnerinut tunngaviliisussapput. Taamaattumik ukiumi makkunani aatsitassarsiornermik ingerlatsineq uuliamillu ujarlerneq ineriartortinneqarput. Tamanna pissutigalugu aamma uagut erngup nukinganik atuineq suliniuteqarnermi isumalluutitut, aningaasaqarnikkut siuariartornissamut tunngaviliisinnaasutut ineriartortittariaqarparput.

Erngup nukinga imminermini, suliffissuit nukissiuutinik annertuumik atuisut nukimmik allanngorannigsumik minguitsumillu pilersorneqarnerisigut inuussutissarsiornermik ineriartortitsisussaavoq, tamatumalu peqatigisaanik erngup nukinga aamma inuussutissarsiutinut allanut, assersuutigalugu aatsitassarsiorfinnik ingerlatsinernut, ajornangippat silap pissusaanut iluaqutaasumik nukimmik minguitsumik pilersuinermigut tapersiissaaq.

Tamatuma saniatigut erngup nukinganik atuinerup annertusineqarnerata, ikummatissanik nunap iluaneersunik tikisitsisarnermik pinngitsuisinnaannginnerput, pilersuinerup qularnaassusaanut aammalu tunisat pisiallu oqimaaqatigiissinneqarnerinut iluaqutaasumik annikillissinnaavaa.

Kiisalu maani nunatsinni erngup nukinganik atuinermik annertusititsinerput nunarsuarmi silap pissusaanut iluaqutaasussaavoq. Nunatsinni inuussutissarsiutinik, soorlu aatsitassarsiorfinnik ingerlatsinernik aluminiumillu aatsitsivimmi nunatsinni aallartitsisoqassappat, taakkulu erngup nukinganik pilersorneqassappata, nunani allani ikummatissat nunap iluaneersut tunngavigalugit nukissiornermik pilersorneqartunut inissiinissamut sanilliullugu, nunarsuaq tamaat isigalugu CO<sub>2</sub> aniatinneqartoq annikillissinneqassaaq.

Taamaattumik erngup nukinganik isumalluutinik atuineq pillugu inatsimmik akuersinissarput pisariaqartoq Naalakkersuisut isumaqarput. Inatsisissatut siunnersuut akuerineqassappat, Inatsisartut erngup nukinganik suliassa qarfirmi sinaakktissanik pilersitsissapput, tamatumalu erngup nukinganit isumalluutitta atorneqarneri siuariartissinnaavai. Tamatuma peqatigisaanik atuinerup illersorneqarsinnaasumik ingerlanissaa aammalu inuiaqatigiinnut tamarmiusunut iluaqutaanissaa qulakkeerneqassaaq.

Inatsisissatut siunnersuut manna immersugassaavoq, tassanilu suliassa qarfik atituumik aalajangersaaffigineqarpoq. Erngup nukinganit isumalluutit annertussutsimikkut atorneqarnermikullu assigiinngissuteqarnerujussuat tamatumunnga tunngavigineqarpoq. Inatsimmut matumunnga atatillugu inuppasuit aluminiumik aatsiterivissaaq, tassalu suliassaq annertoorsuaq eqqarsaatigissagaat ilimanarpoq. Kisianni Naalakkersuisut inatsimmik immikkut

ittumik Alcoa-mut tunngasumik, suliassami pisariaqartitanut immikkut ittunut naleqqussakkamik pilersitsinissaq kissaatiginngilaat. Naalakkersuisut inatsimmik kikkunnik tamanik naligiisitsisumik aammalu suliaq suna pineqarnerseq apeqqutaatinnagu erngup nukinganit isumalluutitta atorluarneqarnerini inuiaqatigiinnut tamarmiusunut iluaqutaasussamik akuersinissap qulakkeerneqarnissaa kissaatigaat. Naalakkersuisut isumaat malillugu tamanna inatsisikkut immersugassatut saqqummiunneqartukku qulakkeerneqartussaavoq.

Inatsit immersugassaammat, Naalakkersuisut nalunaarutinik arlalinnik, suliassaqarfimmut maleruagassanik ersarinnerusunik pilersitsiviusussanik suliaqarlutik aallarereerput. Tassani pingaartumik suliffeqarfinnut akitsuusiisarneq pillugu nalunaarusiaq eqqumaffigeqqussavara, tassanimi naatsorsueriaatsit atuinissamut akuersissutit isumaqatiginninniutigineqarnerini akiliutissat aalajangersarneqarnissaannut tunngavigineqartussat allassimapput. Suliani tamani pisuni ataasiakkaani atugassarititaasut piumasaqaatillu eqqortut tunngavigalugit isumaqatiginninniartarnissaq tassani pineqarpoq.

Inatsisissatut siunnersuut naapertorlugu ingerlatseqatigiiffik ataaseq ukiut 40-t tikillugit erngup nukinganit isumalluutinik atuinermi kisermaassisinnaatitaanissamik angusaqarsinnaavoq. Tamatuma kingorna ukiut 20-t tikillugit sivitsuinissamut periarfissaqarpoq, tamatumalu kingorna piffissaq atuinissamut akuersissutit atuuffissaa sivitsoqqinneqarsinnaananani naasussaavoq. Atuinissamut akuersissutit atuuffiata sivisussusissaanut suliame pisariaqartitaa aalajangersimasut apeqqutaassapput. Taamaalilluni isumalluutinik atuinani tiguminniinnartoqannginnissaa qulakkeerneqassaaq. Atuinerup naanerani erngup nukinganik innaallagissiorfik akeqanngitsumik Namminersorlutik Oqartussanit tiguneqassanersooq Naalakkersuisut aalajangersinnaavaat. Paarlattuanik pisinnaatitaaffimmik pigisaqartup erngup nukinganik innaallagissiorfimmik isaterilluni pinngortitamik iluarseqqinnissaanik Namminersorlutik Oqartussat aalajangersinnaapput.

Atuuffissap taamatut sivisussusilerneqarneratigut aningaasaleerusuttunut atugassarititaasussanik pilerinartunik pilersitsinissap eqqarsaatigineqarnissaa aammalu pinngortitami isumalluutitta nakkutigineqarnerisa ingerlaannarnissaanik qulakkeerinissaq eqqortumik oqimaaqatigiissinneqassasut Naalakkersuisut isumaqarput.

Naalakkersuisut inatsisissatut siunnersuutit matuma saqqummiunneratigut erngup nukinganit isumalluutitta naleqquttumik atorluarneqarnissaannut silap pissusaanut inuiaqatigiillu aningaasaqarnerannut iluaqutaasumik sinaakkusiinissaq kissaatigaat.

Taamatut oqaaseqarlunga siunnersuut Inatsisartuni kajumittumik suliassanngorlugu tunniuppara.